



Aqqalu C. Jerimiassen
Atassut

UPA 2024/98 - 1
30. april 2024

Inatsisartut isummerfigisassaattut siunnersuut, Naalakkersuisut peqquneqassasut naartunermi, erninermi meeravissiarthaarnermilu sulinnigiffeqartarneq pillugu Inatsisartut inatsisaata nr. 5 19. november 2020-imeersut allanngortinneqarnissaanik imaasillugu, angajoqqaatut sulinnigiffeqarneq sapaatit akunnerinit 21-nit sapaatit akunnerinut 37-inut sivitsorneqassasoq aammalu angajoqqaat kiffaangissuseqarlutik namminneq sulinnigiffeqarnermik aaliangiisinnaassasut.

(Inatsisartunut ilaasortaq Anna Wangenheim, Demokraatit)

Sulinnigiffeqartarnermut inatsisit atuuttuusut soorunami nalimmassaqqinneqarsinnaajuaannarput.

Taamatuttaarlu meerartaartartut meeqqiornerlu qangamut naleqqiullugu immaqa taama annertutiginani, inunngortartut amerlisinnaanissaannuttaaq iluaqutaasinnaavoq sulinnigiffeqartarnikkut aaqqissuusseqqittoqassappat.

Siunnersuuteqartorlu ugguuna taperserumavarput, angajoqqaanngorlaat sulinnigiffeqartinneqartarnerat sivikippallaaqaaq!

Angajoqqaanngorlaajulluni unammillingassaq annerpaaq tassaakkajuttarpoq, ingasammik ataatanngoqqammerluni, sinnaqarpiarani suliaartortarneq. Tassami ataataasumut sapaatip akunneri pingasut ikkunneqartartut atuuteqanngiusattut taaginnarneqarsinnaapput, kiisamilimi susaarnaveeqqutit.

Meeraq meeqqaniileqqaarnerminissaaq nutaarluinnarmut pitilluni napparsimakulatsissinnaasarpoq, taannattaarlu angajoqqaajusunut sulinnigitsuukulanermik malitseqalertarluni, annertuumillu akunnermusiaqartunut tunnerlussinnaasarluni.

Ilami aamma kisianni taannaannaanngilaq, meeraq inoorlaaruna paaqqutariaasupilussuaq, akiuussuserneqarnermilu nalaanissaaq nalinginnaasuuvoq napparsimalersarnera ullormi ataasiinnaanngittumi. Tamakkulu tamarmik sulinerlut sunniuteqartarputtaaq.

Maannakkutullu iluseqartumik sulinnigiffeqartarnermi inoorlaannguup pisariaqartinneerpaasani ataaseq annertoq pineq ajorpaa, tassalu anaanami ataatamilu pissarsiassani, angajoqqaat meeqqamut kialaavat taannavoq pingaarnerpaaq. Meeraq anaanami ataatamilu persussaaq toqqissilluni, neriuutigiuartarparalu tamanna amerlanerpaanut atuussinnaasariaqartoq, innunnguutitsinnimi pinngortinneqarnermi angajoqqaagut taakkuupput pingaarnerpaasut qanorluunniit oqartoqartaraluarpat.

Sulinnigiffeqartarnermilu angajoqqaat nammineq kiffaangissuseqarlutik qanoq ilusilerlugit anaanaasup ataataasulluunniit agguataartassaneraattaaq orniginarluinnartuuvoq, tassami anaanaasumut tamanna soorunami siornatigut taamaattussaannartut isigineqarnikuusimangaluaq



ataataasorpasusut aamma paarsisinnaalluarmata inoorlaanut, tulluusimaartorpassuuvugummi meeqqerillammassuusugut meeqqatsinnik pingaartitsilluartuusugut, amingaqisumilli sulingiffeqarsimasugut, imaluunniit allaat ilaatigut ataataalluni sulingiffeqartarneq sivikigaarmat feriassanik nammineq atuiinarnernik taarsiisariaqartarnikuusimasugut.

Tamannalu sivitsussappat ila qujanassaqaq, meerartaartartullumi amerlerliallassinnaaneranittaaq malitseqarsinnaalluni.

Maanna sivilissusaasut angajoqqaanngorlaanut meeravissartaartunullu pitsaasumik kiffaanngissuseqarnerusumillu kinguneqarluarsinnaasutut nalilerusupparput.

Atassummiillu una siunnersuut toqqammaviatigut tapersorsorparput, taamaattumillu siunnersuut Peqqissutsimut ataatsimiitsitalimut innersuullugu.